

2 KOLINIT

Pawl inalet kweitan nimug nein Kolinit, silmanin tayakelesiys ven townen bikakins asisinap kalbaleb. Wankuyeim mo ipiyaves asisinap kalbaleb; mapuna asisinap bwanabwein bulagan ikow Titos, inow Pawl waseg. Mapuna imwasaw Pawl, mo kwayuwein-vak silet ilel min-Kolinit pines.

Kweiboug mwasanin nag itams Pawl nakaleiwag waseg, mapuna ilel kwayuwein let townen, ikkanes. Anilivan-vak nilel silmanin muloul; ilana, “Mtowen Titos bikow mimuloul pines tasimavs tasiyas niyakelesiys Yelusalem waseg.”

Anilivan-vak nilel livanen nawotet moumouvit, peinan ititavin, igeiguy bulagan Yeisuw, mapuna igeg aban vena babaw waseg.

Nakabsilamaw

¹ Kalin nuwag min-Kolinit yakamiy.

Yey Pawl, takawein livanen Yeisuw Kelis, yey; peinan Yowbad nanon mawan. Yey soug bwadads Timotiy nakalel milet neiw, kuvinis, Yowbad natayakelesiys yakamiy ven Kolinit waseg, simiyas tasiyas tayakelesiys ven avakaein Akay waseg.

² Tamads Yowbad son daGuyaws Yeisuw Kelis bisiwyoubumiy mo beitaw nuwamiy.

Aban igeg tage ikalin nuwan

³ Kalin nuwem Yowbad. Mtowen daGuyaws Yeisuw Kelis Taman. Mtowen anmwānet ililabeids, mo itout nanouds.

⁴ Kweiboug abem igeg ilabem vāgan bakalabes tasiyas abes igeg. E, bakalabes tasiyas Yowbad inalab to nilabem.

⁵ Kelis namouvit singay kalilivet, mo singay-vak ililabem.

⁶ Takinew abem bigeg mo bakalabeimiy vāgan beitout ninoumiy, peinan abamiy igeg yakamiy. Takinew abem bwein, bakalabeimiy vāgan beibwein abamiy. Yowbad ililabem mo kakamtilakeimiy vāgan bukukwakins Yowbad bilabeimiy, magat bukwapuleimiy waseg abamiy kalbaleb, māwan abem yakamey.

⁷ Kakakin-wan bukusesus bwein. Abamiy igeg māwana abem yakamey, tage Yowbad bilabeimiy māwana yakamey.

⁸ Sigwey, awoum kutagouwāwes kweiboug abem igeg ven Esiy nakases. Singay kawtamat, kadokena kid mwamovem bo ikous.

⁹ Kadoki bo beiwemas; tage Yowbad tatawtoun, taykitun takanigs; bo ikaluweg abem kalbaleb vāgan bakanamis mtowen bikatinabwem; awoum bakanamis waseg matawtoun tatinem.

¹⁰ E, kakita bakakanig tage Yowbad ikatinabwem; e, tut wanakoug mo bikatinabwem. Kaninamis-wan peinan bo bikatinabwem waseg abem igeg.

¹¹ Yakamiy kulabemas peinan kuntougis Yowbad bikatinabwem; e, kunitougs simiyas babaw

gamag, mo biligen Yowbad, bikatinabwem, mo bikalin nuwads simayas yakamiy.

Pawl sivanan binekes min-Kolinit

¹² Amalivan tawtoun peinan kakakin-wan amasinap bwanabwein, kamnat. Nag mawan ven watinow sinapun, tage peinan Yowbad nisiwyoubum ivagem mo nakamlavag takamnat yakamey, amasinap bwein wasigeis babaw gamag; singay gog wasigeis yakamiy.

¹³⁻¹⁴ Imilet nakalel kuvinis amalivan didumwal, kamnat. Kalamwey-nen kukwakins; sivinag geg bukuyakousis sinap kamnat, mo tutan daGuyaws Yeisuw beiyum beim mo bukumwasaws pinem tawlimiyas yakamey, o yakamey-vak bakamwasaw pinamiy tawlimayas yakamiy.

¹⁵ Kweiboug akakina bukuyakousis amisinap kamnat, mo ivag sivinag wanmugwana baw balakwaneimiy sivay, vagan bukumwasaws sivay.

¹⁶ Ivag sivinag balakwaneimiy mo banoun ban Masidoni; bayum baw, mo bukutaneigs ban Yudiy.

¹⁷⁻¹⁸ Awoum kudokes isisiyuw nanoug peinan nag aw. Ven watinow gingilis mwasanin itimatamsa mav. Yey nag mawan, nag batam mav. Tabudabod tatoukum Yowbad.

¹⁹ Kweiboug sigwey Silvanos son Timotiy nakageiguy livanen Yowbad Natun Yeisuw Kelis; mtowen nag itimatama mav, tut babaw beitam mound.

²⁰ Mtowen Kelis waseg tabanes youd babaw bwanabwein, kweiboug Yowbad nilivnek. Mapuna tayemens waseg Yeisuw, Yowbad yakawanan silmanin.

21-22 Yowbad gog bo nivageids Kelis angamag simayas yakamiy, mo isekeids dawotets; mamagina napulsilas bo isekeids Kululuwan tonen wanuwads, mo takakins ikayuseids.

23 Tage nag aw Kolinit, peinan nag sivinag bakaneimiy. Tabudabod Yowbad.

24 Nag peinan tayakeikay yakamey, tapwɔloul waseg, nag. Kalabeimiy vagan bukumwasaws, peinan nukutawtouns mitapwɔloul waseg.

2

1 Kweiboug nanoug mawan, awoum vayuwein baw, bavag amimwasin. Misinaka alel milet neiw.

2 Kadiloka bukuvages amnag beibwein. Kukin gog bakaneimiy mo bavag amimwasin, ta-kal bivag beibwein amnag; nag.

3-4 Imilet townen nalel, singay igeg nanoug, woug singay moumouvit, sona gunvalam let townen alelel. Nag alelel vagan beivag amimwasin, tage bukukwakins singay asiwayoub wasigeis yakamiy. Agulivan bo alel gunalet waseg vagan tutan baw, nag bigeg nanoug amisinap kalbaleb waseg, peinan akakina-wan bo beivag amisinap bwein mo bamwasaw o yakamiy-vak bukumwasaws.

Biwidis ansinap takalbaleb townen

5 Bo alel milet townen vagan bayakwaneimiy, bakin bukwanawes aygag, o nag. Bo alel livanen teitan yakamiy takalbaleb. Mtownen nag iyageg nanoug agumwaneta yey, tage yakamiy; adok kakit-vak bo iyageg ninoumiy yakamiy. Awoum bikeikay wadoug wasigeis yakamiy.

⁶ Townen ansinap kalbaleb bo kumapus yakamiy; bo misinak. Nanoug mawan.

⁷ Nagein gog kadiloka bikanavin ninoumiy mo kunumlaves ansinap kalbaleb mo beitout nanon. Kadiloka kulabes gamag townen. Awoum singay nanon bigeg; bininuway mo biwtamat.

⁸ E, kadiloka kusiwyoubus gamag townen beibwein.

⁹ Wawun millet townen nalel vagan mamagina bayakwaneimiy mo bakin bukwanawes agulivan babaw, o nag.

¹⁰⁻¹¹ Kal ansinap kalbaleb bukuwid kunumlev, yey mawan banumlev. Kukin aveiyag bawid; pinamiy yakamiy wamatan Kelis, vagan basilwed Seitan. Awoum townen bitawtoun wasigeis yakids. Kakakin-wan non kalbaleb.

Nag itaw nuwan Pawl

¹² Misumkwey nan Tilowas vagan bageiguy livanen Kelis, daGuyaws mo ikaliyow gunaked silmanin inawotet.

¹³ Tage nag itaw nuwag peinan nag aban bwadag Titos, ven townen waseg. Mapuna alisawes, itaneigs, anoun an Masidoni.

¹⁴ Kalin nuwem Yowbad, peinan Kelis waseg, tut babaw imingwayem mo katakayway, kaka-timlakes sinapun Kelis ven babaw wasigeis, mamagina atanoun manisin iskwanes, simasim seikwan.

¹⁵ Bo iskwanemas, tasiyas Yowbad ikatinabwes sisiyas tasiyas biyagages; manisin amalivan mamagina Kelis inawotet silmanin Yowbad.

¹⁶ Tasiyas Yowbad biyagages biskwanemas mamagina kanig manisin peinan bikankanigs.

Tasiyas gog ikatinabwes biskwanemas mamagina mwamov manisin peinan biyamoves. Asteivin kadilokes mawotet townen? Adok nag ibabaw.

¹⁷ Yakamey nag mawan tayyaweids tasiyas, kalisiy sivines bigeiguys livanen Yowbad, vagan maysan bikawes. Tage amasinap kweitan, kamnat; Kelis angamag yakamey, Yowbad nisekem mawotet mo kageiguy wamatan.

3

Pawl ansinap

¹ Tabta livnem bwanabwein bakasekeimiy, ne? Nag. Gamag mwasinis sivines silet mamagina: “Takawein let townen ansinap bwein.” Nag ivag sivinem bukulel malet mawan, o gamag mwasinis bileles malet mawan, nag.

² Malet yakamiy, gamag babaw bivinis, mamagina bikines amisinap kamnat mo bikakins mawotet bwein. Nukutams waseg Kelis mo kumlavags mamagina let, Kelis nilel vagan gamag bivinis.

³ Yakamiy mamagina let, Kelis nilel, nakakow, kasekes tasiyas mo ivinis. Nag ilel pansel waseg, nag. Bo ilel waseg Kululuwan Yowbad tamwamov. Nag ilel wadakul mamas, tage bo ilel wakates gamag yakamiy.

⁴ Mapuna kakapwapout wamatan Yowbad, peinan Kelis ilabem.

⁵⁻⁶ Nag kadilokem bakalivan bakalana, “Matawtoun tatinem mo kawtel mawan.” Nag. Yowbad natawtoun bo isekem mo ikadilokem bakakow livanen inakaleiwag kweivaw, mo

kasekeimiy. Kweiboug kaleiwag dakul waseg nilel tage kweivaw kaleiwag mo Kululuwan waseg isekeids. Kaleiwag townen nilel wadaku**l** bikatimateids, tage Kululuwan iyamoveids.

Kaleiwag kweiboug o kweivaw

⁷ Kweiboug kaleiwag silmanin kanig, nilel wadaku**l**, Yowbad nisek Moses nakaleiwag townen son mititeilin avaka**e**in, ikatipel inek Moses, magin mo ikamnat; ilakamnat singay ee... mo iyenom-nen; Moses iyum, inekes tasiyas min-Yisleil; ta-mawan bikinbunikes magin, peinan mititeilin avaka**e**in.

⁸ Tage kaleiwag kweivaw, Kululuwan waseg nisekeids son mititeilin singay avaka**e**in.

⁹ Kweiboug kaleiwag waseg niyateles gamag iyagages; mititeilin gog nises. Tage kweivaw kaleiwag bikidumwaluds mo beivag mititeilin singay avaka**e**in.

¹⁰ Mamagina kweiboug kaleiwag mititeilin bo ikous, peinan kweivaw kaleiwag mititeilin singay bo ilisow.

¹¹ Kweiboug kaleiwag nag bises bisigeg; tage kweivaw bises bisigeg, mapun singaya immteil.

¹² Danamis peinan kweivaw kaleiwag waseg bo bikatinabweids; mapuna takapwapouts.

¹³ Yakids nag mawan Moses. Peinan Moses bo ipulum magin vagan min-Yisleil nag bikines nakabiyokous mititeilin, peinan niyyenom-wan ee... mo ikous.

¹⁴ Tage ninous moumouvit, nag ikakins. Nagein tut townen ivnivins kweiboug kaleiwag, kweim townen igawa ililum mites. Nag ikines mititeilin Yowbad. Misinaka Kelis bikaliyow mo bikakins.

¹⁵ E, tut nagein towen ivinis Moses nakaleiwag tage kweim igawa ililum ninous. Nag ikakins.

¹⁶ Igaw, kukin kal bitouvin binek daGuyaws, mo bikaliyow kweim towen.

¹⁷ DaGuyaws towen mamagina Kululuwan. DaGuyaws Kululuwan bilikud mo biten wamnat.

¹⁸ Yakids bo ikaliyow magids, takikines daGuyaws mo imteilids, mo kakit kakit ikatlow magids imlavag mawana magin tonen. DaGuyaws inawotet towen, peinan kululuwan mav.

4

Tasiyas nag isimounids

¹ Yowbad inok nuwan yakamey, mo isekem mawotet towen. Mapuna nag kagwey waseg.

² Bo kapiyev kalbaleb sinap, o aveiyag kalbaleb nisowmes. Nag kakatidavis gamag. Nag kakatilow Yowbad anilivan. Tage amalivan moundid, kamnat; kukinemas katamanaw wantamiy, kuliganes amalivan, mo bukukwakins amasinap kamnat. Yowbad ikakin mawan.

³⁻⁴ Kukin aw-sinap bisowm makageiguy wanuwan; bo isowm wasigeis tasiyas takankanigs. Nag bikakins tasiyas. Nag isimounids. Peinan ven watinow gimgilis sitovek kalbaleb bo ivag ninous ikanig, vagan livanen Kelis nag bimteilis tasiyas; Kelis takamnat tonen, mawana Yowbad.

⁵ Nag kageiguy livnem, tage livanen Yeisuw Kelis, peinan datoveks, o yakamey mitouwat yakamey, silmanin bakawtel Yeisuw nawotet.

⁶ Yowbad kweiboug nilivan, ilana, “Kadiloka kamnat bimteil ven, peinan dadub.” Mtowen bo imteil kateids mo takakins yakawanan Yowbad, nises Kelis waseg.

Pawl aban igeg

⁷ Sinapun libalab wakatem mamagina veigun bwanabwein wanuwan kaynad kweiboug; peinan tougwey yakamey. Yowbad nakaleiwag mawan vagan babaw gamag bikakins tatonen natawtoun singay; yakamey nag.

⁸ Babaw gamag iyagagemas, tage nag kakalouw. Isunasun ninom, tage nag kapiyev wotet.

⁹ Bo iyagagemas, tage Yowbad nag ilisawem. Iwawemas, tage nag ikatimatemas.

¹⁰ Wom waseg kakokew Yeisuw inamouvit, vagan mwamovan Yeisuw mo bikamat wawom.

¹¹ Igaw mwamov yakamey tut babaw biyagagemas bakakanig, peinan Yeisuw angamag yakamey, vagan bukukines mwamovan Yeisuw wawom.

¹² Yakamey wanuwan kanig, tage yakamiy kumwamovs.

¹³ Kweiboug teitan nilel mamagina: “Asimounid mapuna alivan.”

Yakamey kasimounid mawan, mapuna kalivan.

¹⁴ Kakakin Yowbad niyakit daGuyaws Yeisuw Kelis kanig waseg, igaw mo biyakituds sods Yeisuw, bitokeids simayas yakamiy bimayeids mo bitatomos wamatan.

¹⁵ Mawotet towen pinamiy yakamiy vagan Yowbad nasiwayoub biwekeimiy simiyas babaw gamag, mo bikalin nuwads singay, yakamiy o

yakamey; babaw yakids bitayakawns Yowbad waseg.

¹⁶ Mapuna nag kagwey. Kaleivids biguyagweys, tage Yowbad ikkatimweis kululuwads yam katanok katanok mo tatawtouns.

¹⁷ Gamag iyagagemas, tage nuwanaw mo beikous. Wankuyeim anagids bivakaein, mamagina, Yowbad nasiwayoub nag beikous.

¹⁸ Youd tasiyas wamatads takines, tage nag taninuwes. Nuwanaw mo beikous. Tage taninuwes youd tasiyas nag takines. Yowbad navavag tasiyas nag beikous.

5

Dabunatums walbalab

¹ Takakins gog wouds mamagina buntuman ven watinow. Kukin bigulekwes, dabunatums kweitan nises, Yowbad nisekeids. Nag bitawlulavaw namad waseg. Bises gog bisigeg walbalab.

²⁻³ Igaw ven watinow waseg nitabwayouys, sivinads kid bitakatlawos wouds, dabunatums walbalab mo bitakawes. Awoum tayamkwaneids.

⁴ Igaw dabunatums townen nitasesus, ikubukub nuwads. Nag sivinad bitasem woud tasiyas, tage sivinad kweivaw woud bikatilow. Mamagina mwamov bikanpwen woun townen ipsapwas, mo beikous.

⁵ Yowbad bo ikatinabweids silmanin mwamovads, mo isekeids Kululuwan mamagina adalivatawns.

⁶ Tut babaw mo bitakapwapouts. Takakins igaw wadabunatums ven watinow nag tasitans sods daGuyaws.

⁷ Tasimounids waseg mo tawotets. Nag takines, nag.

⁸ Takapwapouts, sivinads bitalisawes wouds mo bitanekes daGuyaws.

⁹ Tut babaw sivinads aveiyag nikadok nanon, takinew sods kaleivids bitasesus o takinew bitalisawes.

¹⁰ Igaw babaw yakids mo bitatowas wamatan. Kelis aban waseg bikatkineids, mo bikaleiwag mapun dakalbalebs o dakamnabweins, bo ikunek dawotets ven watinow waseg.

Kweivaw gamag

¹¹ Kagoul Yowbad, mapuna kakatimlakes gamag mo isimounids. Yowbad ikakin amasinap. Adok yakamiy-vak waninoumiy kukwakins-wan.

¹² Awoum vayuwein bakakamtilakeimiy vagan bukukwakins amasinap bwein. Deisa bukukwakins amasinap bwein vagan bukukwayapams wasigeis yakamey mo bukwatimapus asilivan tasiyas ilansa, “Matuwavek bwanabweins,” tage situwavek wanuwes asisinap kalbaleb.

¹³ Gamag mwasanin idokemas takabalawein yakamey. Kukin bakakabalawein, kakabalawein silmanin Yowbad. Kukin gog ninom bidumwal, vagan bakalabeimiy.

¹⁴⁻¹⁵ Kelis nasiwayoub waseg bo isimkinem silmanin nawotet. Kakakina bo ikanig peinads babaw yakids; mamagina takanig babaw yakids,

mo tamwamovs silmanin nawotet mtowen, dawotets tatoneids awoum. Mtowen gog bo ikanig peinads, mo iyakit vayuwein.

¹⁶ Bo ikous makanuway kweiboug, mamagina gamag babaw idokes kalisiy bwein, kalisiy kalbaleb, peinan ikines askakin watoulan. Kweiboug mawan kadok Kelis takalbaleb; tage bo ikous makanuway mawan towen.

¹⁷ Kelis waseg bo bitamlavag kweivaw gamag. Kweiboug bo ikous. Kweivaw bo isap.

¹⁸ Yowbad nawotet towen, peinan itam Kelis silmanin lun bulukwan, mo ilun wasigeis yakids, mo isekeids dawotets vagan gamag babaw bo beitams waseg Yowbad inalun.

¹⁹ Peinan Yowbad son Kelis nises mo ilun wasigeis yakids ven watinow gimgilis. Nag inuw adsinaps kalbaleb vagan bimop, nag. Ilun wasigeis yakids mo isekeids dawotets vagan gamag babaw mo beitams waseg Yowbad inalun.

²⁰ Mapuna kakokew Kelis anilivan. Yowbad bo iguyeimiy wudom waseg. Kelis anilivan waseg kaguyeimiy kadiloka kutams Yowbad inalun wasigeis yakamiy.

²¹ Kelis nag ivag ansinap kalbaleb tage Yowbad ivag Kelis mo imlavag mamagina sinap kalbaleb tonen peinads yakids, mo sods Kelis bitakawes Yowbad ansinap didumwal.

6

Ikalin nuwan min-Kolinit wasigeis

¹ Simey Kelis mo kawotet, kagilagel wasigeis yakamiy, kalana, “Awoum bukutams mav Yowbad nasiwayoub waseg.”

² Bo ilivan gog, mamagina idibakeim yak, ilana, “Bo kadilok tut towen mo aligen amlivan mapuna alabeim yam towen nakatinabweim.” Kuninuways avei-tut ikadilok. Nagein gog. Nagein Yowbad mo bikatinabweimiy.

³ Nag kweitan abkalouw bakasein gamag wasiked; nag. Mata ge bakawotet kalbaleb mo bukuvtokemas livan.

⁴ Tage makawotet bukukines mo kukwakins moundid Yowbad natouwat yakamey. Singay kakaptulem moumouvit waseg, iyagagemas, abem igeg singay.

⁵ Bo iwawemas, iseinimas wadeil, bo ikawna^uweins mav. Kawwotet ee... bo ikalalav nimem, nag kamasis bwein, kasesun-wan amamoun.

⁶⁻⁷ Tage amasinap bwein, nag kayamen asisinap kalbaleb, tage kasiwyoubus, Kululuwan Bwanabwein nilabem, mo kasinap bwein, masiwayoub moundid wasigeis gamag babaw. Amalivan moundid, Yowbad natawtoun waseg. Nakayyous sinap didumwal wuliyougwan wamak^atay wamakimaw v^agan bakatawtoun.

⁸⁻⁹ Kweitan tut ivn^asemas, kweitan tut mo iyagemas. Kweitan tut idokemas kalbaleb; kweitan tut idokemas bwein. Ilansa, “Takatidavidavs tasiyas,” tage amasinap moundid. Idokemas tobwag gamag yakamey, tage Yowbad ikakin amasinap bwein. Idokes kid bakamt^amat, tage bwein

sona mwamovem. Bo imapus amasinap; iwemas tage nag kakanig.

¹⁰ Kalbaleb kalivet mapuna igeg ninom, tage kamwasaw tut babaw. Tasimavs yakamey tage kassekes gamag babaw mo iguyaws. Mawliyoug nag, tage youd babaw yakameyana mavavag.

¹¹ O sigwey min-Kolinit agulivan babaw peinan nuwaneimiy waseg yey nises.

¹² Nag kasina_{le}imiy. Tage yakamiyana nukusina_{le}mas, mo kupiyavemas.

¹³ Ika_lin nuwag yakamiy. Kadiloka bika_lin nuwamiy yey, peinan mamagina nitug yakamiy.

Kadiloka bipyaves youd kalbaleb

¹⁴ Awoum kwativases simiyas tasiyas nag isimounids. Tabta sinap didumwal bikatuvas son sinap kalbaleb, ne? Tabta kamnat beimwas son dadub, ne?

¹⁵ Tabta Kelis beitam son Baloum, ne? Kukin bukusimounid waseg Kelis, amawan bukwaveiyons soum townen nag isimounid Kelis waseg?

¹⁶ Yowbad Tamwamov nabunatum yakids. Awoum bitatams tobwag yowbad youdanen waseg. Yowbad anilivan mamagina:
“Yey basik baninoun wanuwas tasiyas, siYowbad yey o tasiyas gungamag.”

¹⁷ Yowbad anilivan mamagina:
“Kadiloka kulisawes tasiyas takalbalebs, kusina_{le}s.
Awoum kwabkwanes youd bwaboum, kupiyaves,
mo bika_lin nuwag wasigeis yakamiy.”

18 “Yey bamlavag timamiy yey, o yakamiy nitug,
tawaw vinay yakamiy.”

Yowbad Tatawtoun anilivan mawan.

7

1 Sigwey, Yowbad bo ilivnek youd tasiyas bwanabwein peinads yakids. Kadiloka bitawidis wouds bigimagim, o kululuwads bikamnat, mo beivag adsinaps kamnat tatonen, peinan tagoulus Yowbad.

Pawl ikakina asisinap ibwein mo imwasaw

2 Bikalin nuwamiy yakamey. Nag kayageg teitan gamag. Nag kasilakod. Nag kasilponay; nag.

3 Nag alivan mawan vagan bakaneimiy, nag. Kweiboug alana, “Nuwaneimiy wasigeis yakamey nises; takinew bitamats simayas yakamiy; takinew tamwamovs simayas yakamiy.”

4 Akakin-wan amisinap bwein; singay ikalin nuwag pinamiy, mo ibwein nanoug. Igaw abag igeg, tage amwasaw avakaein.

5 Tutan makanoy nakam Masidoniy mo mamouvit kalivet. Nag kamasis bwein peinan youd babaw iyagemas. Wouds watoulan, naviy; tage wanuwads pwayat.

6 Yowbad gog ililabes tasiyas ninous igeg. Ilabem yakamey, peinan Titos neim.

7 Bo ikalin nuwag peinan akin Titos, bulgamiy iwyakeig, ilana, “Tasiyas asisinap bwein, akines. Bo ikalin nuwag. Tasiyas sivines yakoum, asimwasin waseg mo ivlams, itoukums

peinam.” Aligen mo itaw nuwag, amwasaw nag bikakit vagan.

⁸⁻⁹ Kweiboug millet nalel neiw kuvinis mo igeg ninoumiy; yey-vak igeg nanoug. Tage yakamiy igeg ninoumiy yam mwasanin mo kupiyaves amisinap kalbaleb; nagein mo amwasaw peinan alel millet mo kuliganes aygag. Nag amwasaw peinan ayageg ninoumiy, nag. Tage peinan ikanavin ninoumiy inek Yowbad. Bo ayageg ninoumiy, tage nag ayagageimiy yakamiy.

¹⁰ Magat Yowbad biyageg nanoud vagan bitapiyev adsinap kalbaleb, mogo bikatinabweid. Awoum bitapiyev Yowbad nakaleiwag towen. Magat bigeg nanouds peinan youd aveiyag ven watinow, tage nag bitanuways Yowbad, mtowen nag bikatinabweids. Bo bigak mwamovads.

¹¹ E, kuvinis let mo igeg ninoumiy, ne? Bo iseiw nuwamiy vagan beibwein amisinap, ne? Mitawtoun waseg bo kupiyaves sinap kalbaleb; kuwenes sinap kalbaleb, sivinamiy gog sinap bwein; bo kutoukums, ne? Peinan kumapus simiy mtowen ansinap kalbaleb. Youda babaw waseg akakin amisinap bwein.

¹²⁻¹³ Bo alel millet nag silmanin simiy towen-nan takalbaleb, nag silmanin tayuwein towen simiy nisilkod. Silawun gunalet misinaka bukukines wamatan Yowbad singaya kuvnasemas yakamey. Ninoumiy ibwein yakamiy, mogo ibwein ninom yakamey.

E, Titos ikineimiy mo itaw nuwan, imwasaw. Yakamey-vak kakin mtowen Titos mo ibwein ninom, kamwasaw.

¹⁴ Kweiboug nag asilponay mav, tage akayapam, adibek Titos, alana, “Min-Kolinit asisinap bwein.” Nag bayaweid vagan mo beivag agumwasin, nag. Mawan amalivan babaw moundid nakadibakeimiy, mo gunakayapam waseg Titos ikakin moundid.

¹⁵ Kweiboug amisinap kalbaleb, amipwayat; itatat woumiy, mo kutams towen Titos waseg, nukukwanawes aygag, mapuna nagein tut towen singay nuwaneimiy ivag waseg Titos.

¹⁶ Nagein amwasaw peinan akakin amisinap bo ibwein.

8

Muloul

¹ Sigwey, ivag sivinag bukukwakins Yowbad bo ilabes tasiyas tayakelesiys ven Masidoniy waseg, mo imulouls bwein.

² Abes singay igeg. Tasimavs tasiyas, tage imwasaws avakaen, waseg imulouls singay bwein.

³ Bo ikadilokes mawan mo imulouls; ikous, mo imulouls sivyuwein; singay sivines. Wamatag bo akin.

⁴ Bo igilagels wasigeis yakamey, ilansa, “Singay svinem bakalabes tasiyas tayakelesiys Yelusalem waseg.”

⁵ Ninom nag mawan tage singay imulouls. Wanmugwana, tatineisina itames, daGuyaws nagamag o yakamey magamag tasiyas peinan Yowbad nanon mawan. Tatineisina itames, mo imulouls wankuyeim.

⁶ Titos bo isilamaw wotet towen wasigeis yakamey mapuna kadibek kalana, “Kadiloka kulabes min-Kolinit vagan bimulouls bwein.”

⁷ Yakamiy kumugwas youd babaw waseg. Kusimounids bwein, kugeiguys bwein, amisinap avakaein, bo iseiw nuwamiy silmanin miwotet, o kusiwayoubs bwein wasigeis yakamey. Kadiloka bo bukumugwas muloul waseg.

⁸ Nag tayakeikay yey, tage alivan mawan vagan bukukwakins ven mwasanin gimgilis iseiw nuwes muloul silmanin, mo bakin, moundid misiwayoub, o nag.

⁹ Kukwakins nasiwayoub daGuyaws Yeisuw Kelis, guyaw avakaein tage peinads yakids mo imlavag tasimav towen. Tasimav towen bivageids mo bitamlavags guyawaw yakids.

¹⁰ Nanoug mawan. Kadiloka bukuyakousis wotet towen nukusilamaws bweilim nein wankuyeim. Yakamiy wanamug sivinamiy wotet towen. Wanamug-vak mo kusilamaws wotet towen, muloul silmanin.

¹¹⁻¹² Mawana niseiw nuwamiy nukusilamaws-yay, mo biseiw nuwamiy bukuyakousis muloul towen. Mivavag nises silmanin wotet towen. Awoum kuninuways, kulansa, “Nag aveiyag nises waseg yey.” Awoum. Bweina biseiw nuwamiy mo kusekes aveiyag mivavag nises, Yowbad mo bikalin nuwan peinan ninoumiy mawan.

¹³ Nag ivag sivinag mimuloul bivakaein singay, mo bigagab ven mwasinis simuloul, nag.

¹⁴ Misinak tut towen, peinan miwliyoug babaw kumulouls bwein mo kulabes sidayas, peinan tasimav tasiyas. Igaw siwliyoug bibabaw tasiyas

tasimavs, o bikabwag wasigeis yakamiy, mo bilabeimiy. Mamagina bo bikobobt-wan.

¹⁵ Livanen nises mamagina:

“Tasiyas kaeis nisiyavis avakaein nag ivag anatup,
tage tasiyas tasiyas nisiyavis kakit, kaeis bo ikadilok.”

Titos siney budan

¹⁶ Kalin nuwag Yowbad peinan nanon isek Titos mo sivanan bilabeimiy, mawana yakamey sivinem.

¹⁷ Kadibek Titos biwekeimiy, bo itam; tage singay sivanan beiw, peinan nanon mawan.

¹⁸ Kakayabes biweis Titos son bwadads towen butun niliganes tayakelesiys ven babaw wasigeis, peinan singay bwein igeiguy livanen daGuyaws Yeisuw.

¹⁹ Tasiyas tayakelesiys mo isekes-vak nawotet mo simey towen katavin ven babaw kakokew mimuloul, vagan bakalabeimiy, Yowbad yakawanan silmanin.

²⁰ Awoum gamag mwasanin bivtokemas livan, bilansa, “Muloul towen avakaein, tage nag imtakavates bwein.”

²¹ Tage sivinem beivag amasinap bwein daGuyaws wamatan, o gamag babaw wamtes.

²² Kakayeb siyas asteiy sisiy tatounun teitan bwadads. Tut babaw nakayakwen bwadads towen mo kaban ansinap tawtoun. Tut gog towen ikakina amisinap bwein, mapuna bo iseiw nuwan silmanin wotet towen wasigeis yakamiy.

²³ Veiyoug towen Titos ililabeig gunawotet waseg mo bakalabeimiy. Sisiy Titos gamag

tasiyas budidayas, tayakelesiys nikayabes silmanin Kelis nawotet bwanabwein.

²⁴ Kadiloka misiwayoub beibwein wantes tayakelesiys babaw. Livanen misiwayoub nakadibakes tawaw tasiyas. Igaw bikineimiy mo bikakins amalivan mound.

9

Bimulouls silmanin tasiyas tasimavs

¹⁻² Nag kadilok balel millet, balana, “Kadiloka bukumulouls silmanin tasiyas tayakelesiys,” peinan nanawana bo kukwakins. Bo iseiw nuwamiy silmanin wotet townen. Bo kukwatinages bweilim nein wankuyeim. Yey adibakes min-Masidony, alana, “Min-Kolinit, ven Akay waseg, bo iseiw nuwes, bo ikatinages simuloul bweilim nein wankuyeim.” Tasiyas iliganes, mo iseiw nuwes mwasanin, mawana yakamiy.

³ Yey mo akayabes budidayas biwekeimiy, alana, “Bo ikatinages simuloul, nises.” Awoum biwekeimiy mo bibanes agulivan yaweid, awoum.

⁴ Igaw wankuyeim mo bakaw sigwey min-Masidony mwasanin. Kukin nag kukwatinages mo beivag amamwasin, peinan tayyaweid yakamey. O yakamiy-vak beivag amimwasin seikwan.

⁵ Adok kid kadiloka budidayas tasiyas bingwayeigs, alana, “Kumgwayeigs kulivakas simuloul townen nilivanes. Igaw baw mo bitames simuloul townen beibwein. Awoum tasiyas bidokes muloul mamagina kid payin, nag.”

⁶ Kadiloka kukwakins silawun, peinan muloul māwana youpeis. Kukin youpeis bisapwes nag ibabaw mapun mo bitayoys kakit. Kukin gog youpeis babaw mapun bitayoys babaw.

⁷ Tatanok tatanok gamag yakamiy, kavel nanon māwan, bweina bimuloul māwan. Awoum kumulouls sona miwnayuw, kadiloka kutams-wan kusenā mimuloul. Yowbad gog sivanan gamag bininatouts mo bimulouls.

⁸ Yowbad nasiwayoub kadiloka bikatimweis bibabaw wasigeis yakamiy. Nag aveiyag bikabwag wasigeis yakamiy, vāgan bukumulouls bwein silmanin wotet babaw bwanabwein.

⁹ Livānen daGuyaws nises Bukitab waseg mamagina:

“Nawliyoug ilivelov, ivvagein issekes tasiyas tasi-mavs.

Ansinap siwayoub bises bisigeg.”

¹⁰ Yowbad anyoupeis ivagein, isekes tasiyas tabgubags, o kads ivag mo isekeids bitakams. Mtowen bo bikatimweis amiyoupeis bibabaw, mo bivag bisibwasobs bivakaein vāgan bukusiwayoubs waseg; anagin mo bukubānes.

¹¹ Mamagina bukumliguyaws yakamiy mo bukusiwayoubs bwein. Yakamey bakalabeimiy, mo gamag babaw bikavasis Yowbad.

¹² Miwotet towen waseg kulabes tayakelesiys tasiyas tasimavs, mo gamag babaw bikavasis Yowbad.

¹³ Mamagina Yowbad iyakwaneimiy. Kukin bukumounids, o bukutams waseg livānen Kelis, mo bukumulouls bwein silmanin tayakelesiys

tasiyas tasimavs, sisiyas babaw gamag. E, tasiyas tasimavs mo bikavasis Yowbad.

¹⁴ Gamag tasiyas sivines yakamiy, initougs Yowbad waseg vagan bilabeimiy, peinan Yowbad bo ilabeimiy mo nukumlavags tasiwayoub tatonen yakamiy.

¹⁵ Nag bitalivan, Yowbad nasiwayoub singay avakaen. Kalin nuwads silmanin Yowbad.

10

Pawl nawotet

¹ Yey Pawl toneig-wan agilagel wasigeis yakamiy. Peinan Kelis ansinap bo iyamanum. Yey agusinap-vak wamtamiy aymanum tage kulansa, “Kadiveiyov nises mo iwon.”

² Agilagel wasigeis yakamiy. Igaw mo baw nag sivinag bawon bakaneimiy, awoum. Mwasanin yakamiy kuvtokeigs livan, kulansa, “Paul nanon tatonena iwtel.” Kukin nag bikanavin ninoumiy mo baw bakaneimiy, Yowbad natawtoun waseg.

³ Yey guntawtoun nag mawan ven watinow sinapun. Nakases ven watinow tage nag kakanaviy mawan tasiyas ven watinow gingilis.

⁴ Nag kakokew naviy wuliyougwan, tage libalaba wuliyougwan kakokew, mo ikadilokem bakatawtoun Seitan nakaleiwag waseg.

⁵ Mogo kagidem tawtoun livan son sinap kayyapam; o kagidem sinap silabod waseg bisilbwades livanen Yowbad; mo katawtoun waseg nuway babaw, vagan gamag babaw mo bikanawes aygan Kelis.

⁶ E, bo batawtoun wasigeis yakamiy. Igaw bukwawes kaleiwag babaw bwanabwein, mo bamop asisinap tasiyas takapidabs.

⁷ Askakin wamitamiy kukines. Tage kukin kal idok Kelis angamag townen, kadiloka binuweig Kelis angamag yey, maḡwana townen.

⁸ Kukin bakaypom kaleiwag, nag beivag agumwasin. Peinan datoveks bo isekeig gunakaleiwag vaḡan bakatimweis amisinap bitawtoun. Nag isekeig gunakaleiwag vaḡan biyagageimiy.

⁹ Awoum balel millet tawtoun mo beivag amipwayat. Awoum.

¹⁰ Gamag mwasanin ilansa, “Let waseg anilivan tawtoun, tage igaw beim mo bukukines aygan igwey, o nag igeiguy bwein.”

¹¹ Kukin kalisiy asilivan maḡwan mo badibakes tasiyas, “Aveiyag balel walet igaw baw mo bavag wantamiy.”

¹² Nag ikadilokeig balana, “Yey agusinap tawtoun,” nag. Simiyas mwasanin asilivan maḡwan. Tasiyas gog iblaḡbol ninous, ilansa, “Tasiyas asisinap bwein, yaḡkids bwein singay.” Tage nag ikakins sinap tatonen.

¹³ Yey misinaka balivan agusinap tatoneig o gunawotet tatoneig; peinan Yowbad bo isekeig gunawotet wasigeis yakamiy.

¹⁴ Kukin gunakaleiwag nag iwekeimiy Kolinit waseg mo balivan mav wasigeis yakamiy. Nag gog, wanmugwana bo asekeimiy liḡanen Kelis.

¹⁵⁻¹⁶ Nag akayaḡpam kaleiwag waseg. Peinan nag tayuwein tawwotet iwekeimiy, nag. Adok kid

bukusimounids beibwein mo makaleiwag bika-timweis bivakaein wasigeis yakamiy, simiyas ven kadiveiyov gimgilis, tasiyas niweiw-o. Awoum bakayapam waseg wotet townen niwtel teitan gamag.

¹⁷ Kukin kal tallivek, awoum bilivan livanen ansinap tatonen; bweina bilivan daGuyaws livanen.

¹⁸ Yowbad nag bikaypom gamag kavel idok tonen ansinap bwein; tage Yowbad bikakin ansinap bwein, mo bikaypom.

11

Pawl nag mawana tasiyas takatidavidavs

¹ Yey alivan mawana takabalawein yey. Awoum bikawegweis woumiy, mo bakamtel nanoug.

² Yey apwakit wasigeis yakamiy mawan Yowbad ipwakit wasigeis yakamiy.

Bo abokeimiy simiy Kelis mamagina vin napt-abod binek namwan anmwanet. Sivinag mawan batokeimiy bukunekes Kelis.

³ Tage agupwayat Seitan, peinan kweiboug mamagina mwatet ansinap tawtoun ikatidev Iv. Adok yakamiy mawan igaw bikatidaveimiy mo bukupiyaves tapwaloul kamnat waseg Kelis.

⁴ Nakageiguy livanen Yeisuw. Tage igaw kal beiw bigeiguy tobwag Yeisuw, o tobwag kulu-luwan biwekeimiy, o livan townen bwanabwein nukuliganes kukin bukupiyaves, mo bukutams tobwag livan waseg. E, bo kutams waseg, mwasanin yakamiy.

⁵ Takaweins livan towen, kudokes singay bwein gamag; tage nag bilaveigs yey.

⁶ Kukin nag balivan tawtoun, tage agusinap tawtoun. Youd babaw bo akatimlakeimiy ikous.

⁷ Kweiboug sigwey yakamiy nasekeimiy bwanabwein livanen Yowbad. Nag kweitan muloul akow. Yey abus vagan bayamweneimiy. Tabta agusinap towen kalbaleb, ne?

⁸ Mamagina nitavenos simoney tasiyas ven mwasanin tayakelesiys, peinan bo akow simuloul wasipalatan vagan bawotet yakamiy wamipalatan.

⁹ E, igaw kweiboug sigwey yakamiy nitasesus mo ikabwag gunwuliyoug, nag anitoug wasigeis yakamiy. Sidayas gog min-Masidoni y nimeis mo isekeigs.

Mapuna nag anitoug. Nag kweitan mumuloul avag vagan himouvit wasigeis yakamiy, nag. Igaw nag bavag, nag.

¹⁰ Agulivan tawtoun towen. Nag teitan bisilbwed agulivan towen ven Akay waseg. Tabudabod Kelis.

¹¹ Wawun nalivan mawan, peinan singay asiwyoubumiy. Yowbad ikakin.

¹² Gunawotet mawan, waseg bavvalut ee... mo babob asilivan tasiyas nikayapams peinan idokes siwotet mawana yakamey.

¹³ Tasiyas idokes tatineis takaweins livanen Kelis. Tayyaweids gog. Siwotet waseg ikatidavis gamag, peinan askakin mawana takaweins livanen Kelis.

¹⁴ Magen! Seitan-vak ivag ankakin mawana gum-libalab, kannat waseg.

15 Igagaba natouwat tasiyas bivages askakin maḡwan takaweins sinap didumwal. Sikabiyokous kalbaleb, peinan siwotet kalbaleb.

Tut babaw aban igeg Pawl

16 Vayuwein alana, “Awoum kudokeigs takabalawein yey.” Tage bukudokeigs takabalawein, kadiloka balivan kakit maḡwana tasiyas takabalaweins, mo kuliganes agulivan.

17-18 DaGuyaws nag ikaluweg agulivan vaḡan bakaypom sinap, tage bakaypom maḡwana takabalawein yey, maḡwana tasiyas ikaypamwes sinapun ven watinow.

19 Yakamiy kutams bwein wasigeis tasiyas takabalaweins, peinan adok amisinap tawtoun yakamiy!

20 Bukutams bwein, kukin kalisiy bikaweimiy binaweimiy silmanin siwotet bukuwteles, o kukin bikwekways mivavag o bisilkodeimiy, o bikaypamwes asisinap, mo beiweiy mitamiy. E, mo bukutams waseg mituwavek tasiyas.

21 Nag ivag guntawtoun silmanin wotet maḡwana tasiyas. Mapuna agumwasin ivag. Kukin kal bitawtoun mo bikaypom; o yeyvak kukin batawtoun bakaypom mo bamlavag takabalawein yey. Tage bo bakaypom.

22 Adok tasiyas min-Ibliw. Yey maḡwan. Adok tasiyas min-Yisleil. Yey maḡwan. Adok tasiyas Ebelam delen. Yey bo maḡwan.

23 Adok tasiyas Kelis natouwats. Bo alisawes tasiyas. (Agulivan maḡwana takabalawein.) Yey alisawes wotet waseg, o deil waseg; peinan tuta babaw gamag niwaweigs, kakita bakanig.

²⁴ Sivanim min-Yudiy iyousigs mo iwaweigs vatul waseg. Vatul waseg biwaweigs babewein sinawatoun kweinim kweivas.

²⁵ Sivaton iyousigs mo iwaweigs amweilok waseg. Sivtanok dakul ikawes, ilivelovs, imimekeig, iwaweigs. Sivaton amukul wawag. Sivatan iyatuwaneig wakunuwatan yol katanok yam katanok boug.

²⁶ Tut babaw atitavin, alouvat youd kalbaleb nisesus walay. Waked-vak tavveinaws tawayins gamag nisesus. Agugwamag sivines kid beiweigs; tobwag ven gimgilis sivines kid beiweigs. Sivines kid beiweigs waven o wanawoud o wabwanit. Sidayas tasiyas tayyaweids beiweigs kid.

²⁷ Gunawotet waseg son agupulikas, sona mounmouvit; nag amasis ibwein, agumoun, agudak, tut babaw ikamateig moun, son aguloulun amasis wannat.

²⁸ Sona youd tasiyas yam katanok katanok ikubukub nuwag waseg imouvit gunawotet wasigeis tayakelesiys vena babaw.

²⁹ Kukin kal beigwey mo bigeg nanoug; o kal bikalouw mo bikapasal nuwag peinan youd towen ivakaben.

³⁰ Kukin balivan, peinan vagan bukukwakins amawan tougwey yey.

³¹ Awoum bayaweid. DaYowbads, daGuyaws Yeisuw taman, ikakin agusinap moundid. Kalin nuwads Yeisuw tut nag beikous.

³²⁻³³ Ven Damasik waseg, tutan Aletas king ven towen waseg, Tanuwagan ven inagamag ikaymates awkwedan ven, sivines kid biyousigs. Tage taliwog ikaliyowes sintaboul ven boul-nen

waseg, yey asin wanuwan kaynad, ikaygwagweigs ee... an aton watinow, anoun, mo alisow townen nikamliweig.

12

Inoun ikin libalab

¹ Bo bakayapam. Nag bilabeig; tage bakaypom sinap, peinan daGuyaws sinapun bo akin, isisawl matag, mo ikatimlakeig.

² Sinawatan kweivas bweilim nein wankuyeim taw teitan waseg Kelis inoun libalab kasilatoun waseg. Adok won waseg o adok kululuwan waseg. Nag akakin. Yowbad ikakin.

³ Yowbad bo ikow taw townen inow naven bwanabwein waseg. Adok won waseg o adok kululuwan waseg. Nag akakin. Yowbad ikakin.

⁴ Libalab waseg gamag townen iligen sinap kweitant. Nag kadilok gamag bikamtel o bikavteg ven watinow; bwaboum.

⁵ Bakaypom ansinap taw townen, tatoneig awoum. Misinaka balana, "Tougwey yey."

⁶ Tage kukin sivinag bakayyapam, nag beibol agulivan, nag bayaweid, peinan mound agusinap. Tage nag bakaypom sinap. Misinaka kukines agusinap o kuliganes.

⁷ E, Yowbad bo ikamtilakeig sinap babaw. Tage nag sivanan bamwasaw avakaein; mapuna ivag kaligweg kweitant kakat ibes viniyonag, mamagina Seitan nagamag townen ivvasiganig. Mata ge bamwasaw avakaein.

⁸⁻⁹ Sivātoun anitoug silmanin daGuyaws bikablev youd townen, tage bo ipiyeiv, ilana, "Gunsawayoub bo ikadilokeim. Mugwey waseg mo

bikamat guntawtoun.” Singay sivinag balana, “Tougwey yey,” vāgan Kelis natawtoun mo bimekeig.

¹⁰ Mapuna ikunakeig gunagwey, yagay, mounouvit, silakod, o aveiyag biyagageig, peinan Kelis angamag yey.

Agaw tougwey yey tage wanuwag tawtoun.

Pawl ikubukub nuwan silmanin min-Kolinit

¹¹ Mamagina takabalawein agulivan townen. Peinan kusimkineigs. Tage kadiloka bukwawasigs. Takaweins livānen Kelis tasiyas tawtous nag ilisawegs, tasimav yey.

¹² Namag mulin gunawotet navvag bo kukines, singay tawtoun, o tut babaw akaptuleig, peinan moundid takawein livānen Yeisuw yey.

¹³ Aveiyag asekes tasiyas tayakelesiys ven babaw, tage nag asekeimiy yakamiy? Misi-naka youd townen. Nag akow muloul wasigeis yakamiy. Magat agusinap townen kalbaleb kadiloka kunumlaves.

¹⁴ Kakita baw mo beivag sivaṭoun bakineimiy. Nag bakow miwliyoug. Nag ivag sivinag mi-vavag. Sivinag yakamiy. Awoum nitug yakamiy bukuloulouls waseg timamiy yey. Kadilokeig bamuloul wasigeis nitug yakamiy.

¹⁵ Bweina bavgen gunwuliyoug beikous o mwamovag beikous silmanin kululuwamiy. Sivinag yakamiy, mo bukupiyaveigs, ne?

¹⁶ Mounid nag akow mivavag, tage kulansa, “Bo ikatidavids.”

¹⁷ Tage tasiyas nakayabes niwekeimiy, tabta ikatidavimiy tan? Ne?

18 Bo aguy Titos vagan biwekeimiy, mo iweis son bwadads. Tage Titos ikatidavimiy tan? Ne? O yey agusinap amawan? Amasinap katanok-wan. Nag kakatidavimiy, nag.

19 Waninoumiy waseg agulivan mawan, vagan bikalin nuwamiy waseg yey? Nag. Kelis angamag yey alivan wamatan Yowbad. Sigwey yakamiy sivinag bakatimweis amisinap, mo bitawtoun.

20 Awoum bawekeimiy amisinap kweitan, bo bapiyaveimiy. Adok nag beivag sivinamiy agusinap towen. Adok kwamnimans, imouvit dibamiy, kapasal nuwamiy, kusilakods, kuyagays, kuvtokays livan, kwayyapams sinap, mikaleiwag kalbaleb.

21 Awoum ge vayuwein baw mo Yowbad bivag agumwasin o bigeg nanoug wantamiy. Magat taggeinawls tasiyas nag bipyaves asisinap kweiboug kalbaleb o peinan ikaninavays mav.

13

Nakabiyokous anilivan

1 Igaw baw mo beivag sivatoun tut bakineimiy. Kukin bukuyateles simiy, amiteiy o amiteitoun bikavtagis ansinap kalbaleb, kadilok mo bukumapus.

2 Sivyuwein nawekeimiy bo adibakes tasiyas takalbalebs sisiyas asibabaw, alana, “Kukin sivatounun baw mo bamop amisinap kalbaleb.” Tut towen kadiveiyov ases mo adibakeimiy mawan.

³ Sivinamiy bukukwakins Kelis ikatipel anilivan isekeig, waseg allivan. Igaw baw mo bukukwakins. Kelis ansinap wasigeis yakamiy nag igwey; tawtoun igegayous.

⁴ Mamagina tougwey townen bo iweiys, ikati-mates waklos, tage bo imov, Yowbad natawtoun waseg.

Yakamey tougweys mawan Yeisuw, tage Yowbad natawtoun waseg bakamov simey Yeisuw, vagan bakalabeimiy.

⁵ Kuyakwaneimiy vagan bukukwakins, tabta kusimounids waseg Kelis, o nag? Tabta bukukwakins Yeisuw Kelis simiy kusesus? Ne? Tage kukin kal yak nag kusimounid, adok nag.

⁶ Sivinag bukukwakins yakamey bo kasimounid waseg Kelis, kawotet bwein.

⁷ Kanitoug waseg Yowbad vagan nag beivag amisinap kalbaleb. Kanitoug mawan, nag vagan gamag bikakins imawotet bwein. Tage sivinem amisinap beibwein. Kukin bidokes imawotet nag ibwein, bweina mawan.

⁸ Ta-mawan bakasilbwed sinap bwein. Deisa bakawotet silmanin sinap bwein.

⁹ Kamwasaw tougwey yakamey, peinan kutawtouns yakamiy. Kanitoug waseg Yowbad silmanin bikatimweis amisinap, bitawtoun.

¹⁰ Nagein kadiveiyov ases alel millet townen. Igaw baw, awoum bakaneimiy waseg gunakaleiwag daGuyaws nisekeig, vagan bakatimweis amisinap, bitawtoun. Gunakaleiwag townen nag vagan bayageimiy, nag.

¹¹ Adok misinak agulivan sigwey yakamiy. Taneimiy-o. Kusinaps beibwein. Kunages

gungeiguy townen. Kutameimiy simiyas wasigeis. Niwal waseg kusesus; simiy daYowbads, ansinap siwayoub, niwal.

¹² Kumulouls beibwein simsimiyas wasigeis, peinan Yowbad angamag babaw yakids.

¹³ Tasiyas tayakelesiys asilivan siwayoub wasigeis yakamiy.

¹⁴ DaGuyaws Yeisuw Kelis bikalin nuwan wasigeis yakamiy; Yowbad bisiwyoubumiy. Kululuwan Townen Bwanabwein simiy bukusesus. Eimen.

Yey Pawl.

KALEIWAG KWEIVAW
The New Testament in the Muyuw Language of Papua
New Guinea
Nupela Testamen long tokples Muyuw long Niugini

Copyright © 1976, 1993 The Bible Society of Papua New Guinea

Language: Muyuw

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 21 Feb 2024 from source files dated 31 Aug 2023

517ae3da-6769-54e8-8afd-7d53f958558c